

insularis illis qui Hiberniam maxime infestaverant, interfectis. Hæc ego aliena licet ab instituto, summam, quæ pro rei magnitudine ab historico fufius sunt explicanda.

COMITATUS S L E G O.

SVperius Comitatus Slego adjacet benigna pascendis pecoribus fecunditate, totus etiam mari obversus, quem ad Boream Trobis fluvius Ptolemæo RAVIVS ex Erno lacu emissus ab

Ultonia: à vicinis Comitibus Letrim & Roscoman Curlew montes difficiles separant Succusque amnis interdividit. NAGNATAM urbem hinc alicubi statuit Ptolemæus, sed quænam illa fuerit eruere ingenii non est nostri. LIBNIUM etiam fluvium in hoc tractu locavit ille, quem librariorum incuria exulante ad suam Dubliniam modo reduximus, sed locus quem designat Ptolemæus nunc *The Bay of Slego* vocatur, portuosa statio sub Slego præcipuo hujus Comitatus loco, ubi castrum quod nunc sedes familiæ O Conor qui hinc de Slego denominati, & genus, ut ipsi ferunt, à Rotherico illo O Conor Dum trahunt, qui cum viribus maxime valeret, se ut Hiberniæ Monarcham gessit quo tempore Angli primum Hiberniam sunt ingressi, & ægre se Henrico Secundo Angliæ submisit, verbis licet submissionem professus, sæpiusque tumultus excitans (ut author ejus ævi anonymus prodit) hæc Adriani Papæ verba in Diplomate Angliæ Regi facto sibi fraudi fuisse clamitavit: *Insulam illam ingrediatis, & quæ ad honorem Dei & salutem illius terræ spectaverint exequaritis, atque illius terræ populus te recipiat, & sicut Dominum veneretur.* Donec Alexander Tertius PP. novo suo Diplomate jus itidem Regibus Angliæ in Hiberniam confirmasset: tunc enim ille mitior ad æquiores descendit conditiones, ut mox dicemus. Post O-Coneros, O Don, O Harris, O Ghar, Mac Donagh in hoc agro sunt nominatissimi.

Vide Diploma lib. 2. cap. 6. Girald. Camb de Expugn. Hiberniæ. pag. 787.

COMITATUS L E T R I M.

Comitatum Slego ad Orientem Solem claudit Breany, possessio antiquæ familiæ O Rorck, quæ genus retulit ad Rothericum Hiberniæ Monarcham (Rorck illi, sua qua gaudent contractione vocant) donec Brienus O Rorck Dominus Breany, & Minterolise à Sixto Quinto PP. & Hispano spe lactatus inani fidem in Elizabetham Reginam perfide abjecisset, armaque induisset, statimque in Scotiam fugatus, & in Hibernia.

Breany.

Angliam remissus inconsideratæ temeritatis pœnas suspendio dedit: ejusque latifundiis Coronæ adjudicatis, hæc à Ioanne Perrott Prorege Comitatus fuit constitutus, & Letrim à primario oppido nuncupatus qui totus montibus affurgit, luxuriose graminosis, non adeo tamen ut illud Solini de Hibernia omnino sit verum: *Hiberniam ita pabulosam esse ut pecuaria nisi inter dum à pastibus arceantur, in periculum agat satietas.* Totque pascit pecora ut angusto illo quo circumscribitur spatio, uno tempore supra centum viginti millia pecorum capita numerarit. In hoc Achonry est Episcopatus qui sedi Elpheni jam adunatus, & Sineus sive Shanon princeps fluviorum Hiberniæ hinc originem ducit, qui nunc angustior, nunc diffusior variis flexibus multas regiones (ut diximus) interluit. Primariæ familiæ sunt O Rorck, O Murreies, Mac Lochleims, Mac Glanchies, & Mac Granelles, omnes puri puti Hibernici. Ioannem de Burgo filium Richardi Comitis Clan-Ricard, quem Elizabetha Regina Baronem Letrim creavit, & mox æmuli occiderunt, non ex hoc Letrim, sed alio quopiam loco titulum accepisse sunt qui affirmant, nec mihi certo compertum.

COMITATUS R O S C O M A N.

SVb Comitatu Letrim ad Meridiem subjacet Roscomon Comitatus ab Henrico Sidney Prorege institutus, angustiori sed longiori spatio inter Succum fluvium ab Occasu, & Sineum fluvium ab Ortu interclusus, & à Septentrione Curlew montibus conclusus. Terra est in planitiem plerumque porrecta, fertilis, & quæ numerosa pascit armenta, adhibitaque mediocri cultura fruges benigne profundit. Qua Septentriones spectat Curlew montes prærupti eminent & impervii, donec via Georgii Binghami curâ difficili labore fuit excisa; Quæ non ita pridem Conieri Clifford Conachtia præfecti, & ejus incuria fortissimorum veteranorum infelici cæde signati. In hoc Comitatu quatuor censentur Baronie, sub Curlew montibus ad Sineum fluvium Baronia Boile primum occurrit, ubi olim celebre monasterium fundatum anno MCLII, una cum Monasterio de Beatitudine: & Mac Dermot quasi rerum positur. Deinde ad Succum Baronia Balin-Tober, ubi O Conor Dum plurimum potest, cui adjacet Elphen sedes episcopalis. Inferius Roscoman O Conori Roo, id est, Rusi Baronia, in quo est oppidum totius Comitatus primarium Castro à Roberto Vfford Hiberniæ Iustitiario olim munitum, sed ædificiis culmeis tectis; & magis ad Austrum O Kelliorum Baronia Athlone à præcipuo oppido denominata, quod suum habet castrum & præsidium, & pontem è vivo saxo pulcherrimum, quem

Curlew montes.

Baronia Boile.

Balin-Tober.

Roscoman.

1268. Athlone.